

Anlu Nău 2011!

Tinjisits sh-duruts Armânji !

Cumândăsearea a Consillui Armânjiloru / MakedonArmânjiloru vâ uarâ unu **Anu Nău 2011** hâriosu, cu sânatati, ghineatsâ sh-prucukii, a voaua sh-a fumeiljloru a voasti! Anlu 2011 s-hibâ unu anu cu cama multu amintaticu trâ Armânami!

Haraua nai ma mari tu anlu 2010, trâ tutâ Armânamea, fu Adunarea Atsea Mari a Armânjiloru tsi s-dizvârti Muscopuli, tu dzuua pisimâ di Stâ-Mârii. Aestâ Andamusi adună Armânjilji tu aestu locu iu isturia a loru easti nai ma ahândoasâ, aclo iu sh-aspusi pisti eti giuneatsa, aclo iu popullu a nostu tradzi nâdia câ prindi s-toarnâ ta s-aprindâ diznău pira a vreariljei trâ isnafi, unâ pirâ tsi s-armânâ niasteasâ sh-tsi prindi s-creascâ sh-pali s-nâ adunâ tu cohi. Avemu nâdia câ aestâ protâ mari andamusi va hihâ unu izvuru di iu va s-azvoamâ inirghia di cari au ananghi tuts atselji Armânji tsi suntu etimi trâ lucurlu armânescu.

Tora, tu bitisita anlui 2010, Consillu Armânjiloru / MakedonArmânjiloru hâristuseashti nica nâ oarâ atsiloru Armânji cari, cu multu copusu, agiutarâ ta s-poatâ s-facâ aestu „yisu“ tsi-lu bânarâ tuts Armânjilji cari featsirâ cali lungâ sh-greauâ ta s-adunâ tu unâ dealihea harauâ, ducheari armâneascâ, vreaki sh-acâkiseari. Multi hâristuseri lâ si pricadi sh-a pareiloru di tiniri tsi, cu lucurlu a loru niacumtinatu, mutarâ tu padea di Muscopuli unâ hoarâ safi Armâneascâ, andreaptâ ca unâ nveastâ cari cu multâ harauâ sh-ashtiptâ cuscârilji.

Sh-tu Anlu 2011 cari nkiseashti mâni, Consillu Armânjiloru / MakedonArmânjiloru va cilâstâseascâ, ashi cumu u-adrâ sh-pânâ tora, trâ prumuvarea sh-avigljearea axiiloru culturali armâneshtsâ shi s-aspunâ a lumiljei Armânjilji ashi cumu suntu tu locurli iu elji bâneadzâ.

Consillu Armânjiloru / MakedonArmânjiloru
Biroulu di Cumândăseari

tu 31-li di Andreu 2010

(Bulitinu Infurmativu Nr.25)